



Fasnacht 2006

Basler Regierig isch am spaare
au de Schugger faahre si an Kaare
Buessgäld miesst meh inne koo
sunscht muess e Poschte Fädere loo
Schliessed die Pöschte und diend uusemischte
aber bitte mit samt de Bolizischte

Z' Röschänz risst ain d' Schnuure uff
das macht dr Basler Bischof muff
Als Prieschter darfsch di nit beklage
und hesch erscht rächt schoo gar nit z' saage
Am beschte haltisch d' Schnuure und blibsch stuur
und machsch nie vom Bischof e Karrikatur

In Himmel luege kaa si guet
no besser isch si nimmt dr Huet
Ych find das aifach super-toll
äntlig heft si d'Nase voll
Me weiss zwor nie und ruck zuck zuck
kunnt die Gummsle wieder zrug

Dä Zirkus um d' Bundes-Bresidänte-Wahl
das Gschiss wägem Ghaim-Dienscht-Skandal
Als Basler Spatz grieg yych bald Würm
mi närvt im Bundesroot das Gschtürm
Die kemme mir vor wie siebe Gleen
wo dr ganz Daag numme Saich ableen

Die Persoone-Freyziigkait find yych guet
die macht mir wieder e bitzli Muet
Mir kenne do nur jubiliere
und was in d'Schwyz kunnt besser reguliere
In däm Vertrag duet hindedruff nämmlig stoo
fir jede Schwoob wo kunnt – muess ai Ziircher goo

Die tolli Bar Rouge im Mässeturm oobe
dasch e lässigi Baiz yych muess si aifach loobe
Muesch zwor mänggmool e bitz warte voruss im Gang
und kasch aalegge was d'willsch s'gitt kai Glaiderzwang
Nur ains muesch jetz aa ha, das find yych no s'Beschte
kunnsch nimme uuse ohne kugelsicheri Weschte

Me kaa bald niene me e Zigi paffe
nit im Zug, nit uff eme Amt und nit bim Schaffe
Au in dr Baiz nach em Asse nimm yych ganz cool
aifach uss Gwohnet e Zigi in's Muul
Und yy rauch denn trogge und zünd si nit aa
aber maischtens frogt denn ain eb yych Fyyr mies haa

S'isch en Eländ mit däre Zoll-frei-strooss
wäg däne Schwoobe isch doo dr Deyfel los
S'wär besser die wurde my Idee iibernäh
denn wurd's e lange – lange Tunnel gäh
Denn kennte si bi Lörrach in dä Tunnel iine
und wurde kurz vor Mailand wieder erschiine

Me hett Angscht vor ere neije Epidemie
s'isch kai Entzündig und au kai Allergie
Es git's kai Pille dergäge und kai Therapie
me gseht aim nit aa dass me grangg sett si
Me hett au kai Fieber, aber s'gooht nit verbi
es macht au nit weh aber s' kennt aasteggend si
E Ghirnhutentzündig kaa's au nit si
wo nit isch kaa au nit entzunde si
Und s' hilft au kai Zäppli us dr Drogerie
aber me verdient no e huffe Gäld derbi
Dr Doggter hett gmaint das gooht nie verbi
die Grangget haisst Muratitits Yakinogie